



Senin, 03 Juli 2023
Ogen : Pengerana 7:25



Tetap Erlajar



Manusia la banci lepas i bas erlajar. Lit istilah *long life education*, si ertina maka segedang-gedang geluh erlajar. Benaken manusia tubuh ku doni seh nadingken doni enda la banci lang erlajar. Tentuna adi bage erlajar enda jadi orat geluh manusia. Kinatana maka lit ka nge kalak la ngit erlajar. Malas dengen turah penggejapen la perlu erlajar. Deba lit ka erlajar tapi la tutus entah nunut erbahanca kai sinipelajari e la iantusi alu payo.

Ulih kininggiten erlajar e me ngaloken kepentaren. Kepentaren e maba geluh reh ulina kap. Kitap Pengerana nuriken maka situhuna labo ngasup kita metehsa erti geluh alu mbages. Melala si la terantusi bas kinata kegeluhen enda, amin bage gia si nuliskan Pengerana naksiken maka ia tetap erlajar muat pemeteh. Erlajar e erbahanca ia ndatken pemeteh ras kepentaren si teridah arah ngasupna ia njabab penungkunen-penungkunen si lit bage pe ngukuri si mehuli i bas kegeluhenna. Teridah maka erlajar enda ngubahken cara rukur rikut ras lagu langkah. Guna si e ijemba kita gelah terus erlajar i bas ndalani kegeluhen.

Sada kata bijak nuriken maka "jangan pernah berhenti belajar, karena hidup tidak perna berhenti mengajar". Kepeken bas kerina si lit bas doni enda banci mereken pengajaren man kegeluhenta. Cuba tatap ku sekelewetta melala pelajaran si banci idatken arah ia, la terjeng si e i bas kerina situasi si sangana nialaken kita pe banci kita erlajar, ras sideban. Selaku Moria, iajuk kita terus erlajar. Si nggit erlajar nggit makeken kesempatan, e maka jadikanlah erlajar enda jadi orat geluhta.